

光緒鎮海縣志

鎮海縣志卷七

山川下

海

在縣城東北東接三韓日本南通閩廣諸番西北直抵京師潮汐往來自有一定候常多颶風南越志云颶風者具四方之風也常以五六月發未至時雞犬爲之不鳴嶺表錄云秋夏間有暈如虹者謂之颶母必有颶風小坡蘇過賦云斷霓飲海而北指赤雲夾日而南翔此颶之漸也發則排戶破牖損瓦擗屋礮擊巨石揉拔喬木勢翻渤澥響振坤軸鼓千丈之清濤翻百仞之陵谷濟之以雨尤爲可畏禾已花實而值之則闔境絕穗俗之所當備也海潮自定

南通奉化

嘉靖志

潮侯

|            |           |
|------------|-----------|
| 初一十六子未午未平  | 初二十七丑初未初平 |
| 初二十八丑正未正平  | 初四十九丑未未未平 |
| 初三二十寅初申初平  | 初六廿一寅正申正平 |
| 初五二十二卯初酉初平 | 初八廿三卯正酉正平 |
| 初七廿四卯未酉未平  | 初十廿五辰初戌初平 |
| 初九廿六辰正戌正平  | 十二廿七辰末戌末平 |
| 十一廿八巳初亥初平  | 十四廿九巳正亥正平 |
| 十三三十巳未亥未平  |           |
| 十五         |           |

本縣潮候

[illegible]

薛肅潮論 觀古今諸家海潮之說多矣或謂天河激湧亦云地機翁張虛肇以日激水而潮生封演云月周天而潮應挺空人漢山湧而濤隨析木大梁月行而水大源殊派別無所適從索隱探微宜申確論大中祥符九年冬奉詔按察嶺外嘗經合浦郡沿南溟而東過海康歷陵水防恩平注南海迨由龍川抵潮陽自出守會稽移蒞句章是以上諸郡皆沿海濱江朝夕觀望潮汐之候者有日得以求之刻漏究之消息十年用心頗有準的大約元氣噓吸天隨氣而漲敏溟渤往來潮應天而進退者也日者衆陽之母陰生於陽故潮附之於日也月者太陰之精水者陰類故潮依之於月也是故隨日而應月依陰而附陽盈於朔望消於朏魄虧於上下弦息於朏魄故潮有大小焉今起月朔夜半子時潮平於地之子位四刻一十六分半月起月朔夜半子時潮平移三刻七十二分對月到之時以日臨之次潮必應之過月望復東行潮附日而又西應之以日臨之次潮必應之一十六分半日月潮水亦復會於子位於是知潮常附日而右旋以月臨子午潮必平矣月在卯酉汐必盡矣或遲速消息又小異而進退盈虛終不失於時期矣或問日四時潮平來皆有漸惟浙江潮至則亘如山嶽奮如雷霆水岸橫飛雪崖旁射澎湃奔激吁可畏也其奮怒之理可得聞乎曰或云夾岸有山南曰龕北曰赭二

山相對謂之海門岸狹勢逼湧而為濤耳若言狹逼則東溟自定海吞餘姚奉化二江俾之浙江甚狹迤潮來不聞濤有聲也今觀浙江之口起自纂風亭北望嘉興大山水闊二百餘里故海商船舶怖於上潭惟汎餘姚小江易舟而浮運河達於杭越蓋以下有沙潭南北橫亘隔礙洪波蹙遏潮勢夫月離震兌他湖已生惟浙江水未漲泊月經巽乾潮來已半濁浪擁滯後水益來於是溢於水潭猛怒頓湧聲勢激射故起而為濤非江山淺逼使之然也

宋之間祠海肅事祠春溟宵齋洗塵慮雞鳴見日出鷺下驚濤驚地闕入荒近天迥百川注筵端接空曲目外惟粵霧暖氣物象來周游晦明互致牲匪元亨輕滌期靈瞻的的波際禽法云島間樹安期今何在方丈蔑尋路仙事與世隔冥搜徒已屢四明背羣山遺老莫辨處撫中良自慨弱齡添恩遇三人文史林兩拜神仙署雖歎出關遠始知臨海趣賞來空自多理勝孰能喻留神竟何待徒倚忽雲暮經興開頌發祀海樂章溈洞鴻濛天與無極導納江漢節宜南北順助其功善下惟德我祀孔時以介景福淳祐間頌發祀海樂章百川所歸天地之左瀕洞鴻環功高善下行都攸依百祿是荷制幣嘉玉以侑以妥

滄溟之德東南具依熬波出素國計攸資

石門卻敵濟我王師祀其享錫益界燕綏

貢師泰海歌黑面小郎掉三板載取官人來大船日

正中時先轉舵一時舉手拜神天出得蛟門才是海

虎蹲山下待平潮敵帆轉槍齊蓄力不見前船正過焦

大星煌煌天欲明黃旗上寫總漕名願得順風三四

日蚤催春運到燕京隻嶼山前放大洋霧氣昏昏海

上黃聽得舵頭人笑道半天紅日掛帆檣四山合處

一門開雪浪掀天不盡來船過此閒都賀喜明朝便可

到南臺千戶火長好家主事事辛苦不辭難明年載

糧直沽去使著綠袍歸作官大江駕舵如駕馬數人

左右搜長牽萬鈞氣力在我手任渠雪浪來滔天碇

手在船功最多一人唱聲百人和何

事淺深便記得慣會海上看風波

戴良泛海仲夏發會稽乍秋到句章擬航黑水海首

渡青龍洋南條山已斷北界水何長遠近浪爲國周圍

天作疆川后偶安靜天吳亦屏藏蕩漿乘月疾挂席逐

風揚零露發蟠木旭日照耀扶桑我行無休隙此去何渺

茫東海蹈仲連西溟遁伯陽輕名冀道勝

重已冀時康孰謂情可陳旅念坐自傷

吳浩候潮之定海江樓歌罷酒方醒畫艦如飛戴曉

星萬浦晴暉蛟浪赤兩關秋色虎巖青浮沈白日漂長

劍汗漫神州。憩小亭白髮何  
人猶下釣。寂無車馬到滄溟。  
沈愷望海。憑闌東望海門。秋元氣茫茫。日夜浮大壑。  
堪同天地老。滄桑幾斷古今愁。晴瞻萬里鳥將沒。晚看  
一天星倒流。卽此已成天。  
外境更於何地覓瀛洲。  
薛三省觀海。獨憑高閣豁塵眸。不盡滄溟一瞬收。日  
月升沈。天水接風濤。吞吐地山浮。壺中卻羨眞三島。環  
外偏疑大九州。我欲乘槎  
星漢轉黃河。口處潮洶流。  
周大邦海風行。東溟一望不可極。之波濤吞天沃日  
亘萬里而怒號。治今同象叵難測。其間崩雲息雨莫不  
自晦冥。霧墮之狂飈。上映長虹碧。含暈隱隱箕宿寒芒  
翹乍看浮塵起。藤末開張翁怒吹。淞滂未讓姦車疾。不  
數馬銜驍剛聲一振。那可得河獅怒吼。熊羆哮否。則秋  
郊圖號虎無乃。南衣爲餒鴉。咸陽一炬未爲烈。犀甲萬  
片安能遭霹靂。豈往復百靈該。陽侯禹疆徒切怪。矇矓淚  
沾沓無極遙。聽若水日影暖。肩霄直不知天輪而上地。  
軸而下何物充塞乎。卑高我欲乘之破巨浪。九萬里翻  
齊扶搖更欲浮。樗枏息接星漢手。擒斗柄挽盡海水絕。  
驚潮銅鳥何足據。與母何足妖思之。  
不得割然嘯。但覺毛髮蜩蟻聲蕭蕭。

黃景仁登鎮海城樓觀海地不足東南厥池曰朝夕  
浮天忽如夢絡域斯其脈歸墟無盡藏委輸孰爲役渺  
茫撫遺經鴻濛期夙昔一越而三千奢願何時釋五更  
登茲樓羅爾墮心魄治夷疑蜚遊騰軒怖鼉擲星星獻  
殷霞照面不成赤霞奔如有聲日已千尺濛濛溼未  
收照見鳥煙白髮髯樽桑華閃盪碧津碧天開東皇家  
帝輿九老宅且可神與遊詎能目爲逆青岱隱北指陘  
越昧南適嗟茲剝鄞間生民夙多厄妖寇時紛乘島夷  
每充斥去滅濤干尋來便風一席海隄復時潰當衝盡  
枯骼我來幸清晏所見餘悲惜休養氣漸蘇承平歲逾  
百避風無爰居澄瀾有水伯破車歸波臣響杆坐泉客  
蓬萊隱可望祖洲了如積萬頃明鹽田三時貢蕃舶隨  
珠出沈淵蜃貝來重譯所苦雀躍遊欲往體無翩誰滲  
蝸皇灰助填精衛石盡化桑田平無使潏溷隔餐得楓  
香歸頽光  
駐駒隙

江

大挾江與鄞江通

寶慶志

縣南城外自蛟門海洋分派爲支

江向西汭流七十里抵郡城三港口分流西南六十里至

鎮海縣志

卷七

山川下

四



鄞縣它山堰西北二百里抵紹興上虞縣通明壩名勝源

發於紹興餘姚之太平諸山至丈亭分而爲二前江由車

廢厯西渡經郡城之北至邑出大浹口入於海慈谿縣志

楊守陳秋江別意 蛟門九月天雨霜潦盡潭清水痕

改鴻雁來時月滿洲蜃龍蟄處雲連海君在蛟門客舍

中卧聽落葉鳴悲風萬里愁心雙闕下十年歸夢五湖

東今朝拂樹臨江浹病馬蕭蕭挂行李斷霞猶照竹山

坡新煙正隱梅墟市古渡煙深水滿隄敗荷枯葦共淒

淒綠江客棹將搖檣隔岸人家尚掩閨總戎出郭來相

送驛馬鳴珂擁賓從楊柳風高鼓吹喧兼葭路溼旌旗

重官亭置酒敞雲屏酒醖尊香鱸擗肥黃花晚對瓊筵

落白鳥寒衝玉振飛驪歌乍逐菱歌斷更促繁絃隨急

管舟人時報晚潮生坐客翻嫌晴漏短酒罷臨歧對夕

陽可憐一別成參商虎蹲山前水蕩蕩馬阻滙北天茫

茫蒲帆片幅隨風去知向前江泊何處路指東湖雨後

山天橫冀北煙中樹舊日三鱣下講堂明朝駟

馬謁明光春光被酒看花處莫忘秋江別意長

謝泰宗遊大浹江 身逐波濤險心隨魚鼈遊涪翁江

上問既拾復何求 九曲似黃河舣航從此過誰教人

不渡鯨穴漲煙波  
蛟虎北雄關千艘定百蠻將軍弓  
馬勁不管水潺潺  
浮漚如浪沒示我陸沈意不怕蛟  
龍吞只恐腥羶餌  
江湖往返信一  
日兩回催何事錢唐渡三朝竟不來  
陳元核浹江舟中用東坡韻  
憶昔扁舟下淺沙雨脚  
初歇風衙衙中流一葉忽簸揚打頭浪急飛寒花鎮鄞  
相去五十里三十六槍未還家今朝晚晴偶放棹舳艫  
聯翩銜尾鴉水波遙裔橫匹練日彩容與流滂葩長  
聲  
打送同帆過人生遭際難稱意背癢莫獲長爪爬即看  
今昔分險易世事紛紛良可嗟萬  
里破浪吾所急單舸徑耽扶桑霞

舉猛江縣南二十里自大浹江口達鄞江水道本直至馬  
嘴匯成舉舉至三官堂始西接鄞江潮流甚猛故名乾隆  
志

鷺林江縣南四十里甬江綿亘九曲而出大浹口而江流  
之疾徐因之故瀕江之地當江流之疾者雖石岸亦圯值  
江流之緩者雖塗泥亦堅鷺林回流舒緩是以沿江五十

里地多草場乾隆元年近場居民分疆畫界報墾陞科外  
築長堤堤之下鑿池濬澮以資灌溉堤堅而高鹹潮不能  
妨禾黍斥鹵荒蕩盡爲良田

乾隆志

小狹江縣南十五里西抵鄞縣五鄉硯

延祐志

自竹嶼山海

口分沂爲支江蜿蜒西流六十里抵崇邱東岡硯

曹府志

今

燕山義成兩硯先後告成江盡爲河矣

備志

黃崎江

一名環崎

縣東南一百十里自崎頭洋分派爲支江西

北流約半潮至蛟門出大海

曹府志

崎頭山遙峙東南黃茅

山大小榭山金塘山隔峙西北夾而爲江

乾隆志

梅山江縣東南一百十里自崎頭海洋發源西北流入烏

崎山港徑大嵩通於海

嘉靖志

梅山在南崎頭山在北夾水

爲江

崙江縣東一百里

青龍江縣東南一百里有古亭爲濟渡處

白家浦縣南三里

山家浦縣南四里

以上乾隆志

河

城中

南河發源於縣治之東北卽古濠河也西行從嘉定橋橫帶橋復折而北過善慶橋至河塘又折而西南至市西橋出水門而西合於夾江河

王令志彙

古濠河縣治北城中發源

西流抵大市堰長四十五里

嘉靖志

中河源始梓蔭山麓循學宮西衛治南西行與河塘水合

至晏公廟橋曲折至西水門合於中大河

王令志棄

北河源始於觀音寺之後北行至淵德觀之西西行一里

許折而南至洞橋復折而西抵西水門合於中大河

王令志棄

考古濠明以前通鎮遠門外王家硤閘輪洩於海自洪武

丁卯展城跨濠而濠河反在城內其時尙穴西水門以接

慈谿之水永樂以後塞王家硤閘與西水門止畱南水門

復開西南新閘遂至城內之水隔絕不通河多淤塞故迹

日湮張司馬東沙謂宜求故道復西水門以接慈流潦則

由東以洩是也自隆萬間慈人因運糧至廣安倉道迂不

便遂復開西水門以北河爲運道城內諸水得與中大河

相通至

國朝戒嚴閉者又幾二十餘載康熙十一年乃復啟若南

水門之閉自明時已然矣原注嘉靖二十年指揮夏紀濬深

古濠河五尺康熙三十五年令唐鴻舉掘學宮東河並濬

城北河訓導許德俗爲之記唐令志彙歲久漸淤乾隆十二年

令王夢弼督民復濬三河乾隆志

東泉池在縣東泉有二脈其東之脈鹹其西之脈甘簡要志名

甘鹹甘泉常盈雖遇旱暵不耗竭鹹者多澗有時而出味

未嘗雜宋嘉祐三年令鄭洙以石甃四旁其廣二十餘丈

其長居廣之半其深得長四之一邑人至今蒙其利寶慶志

後淤塞明崇禎間令張琦重浚甃石長廣不能如舊而泉

脈亦不可得今所名一鑑池是也

洗馬池縣東北巾子山下嘉靖志相傳張世傑駐兵飲馬於

此故名王令志

沙井池在北城雍正府志

放生池一在總持寺前一在城北廣濟林王廟西一在東

郊東嶽宮西

日池縣署東北

月池縣署北

梓山池今爲鯢池書院映池以上乾隆志

縣前溝在縣署東百步許深三尺濶二尺水直通南門外

濠河雍正府志

淵德聖井在淵德觀內久旱不涸

陳志

陳景沛案曰淵德乃建炎間改封神號後道士請

為觀額是因觀名井非因井名觀也嘉靖志誤注

謝泰宗淵德觀中井水甘冽道士常尋奇蹟詩入功  
德永真無量流入仙源念湧漾黃金竈裏丹爐泥五色  
生煙伯陽餉九轉雲映霞液膏神風冷然形神暢玉清  
天帝好樓居高銓城隅紫雲車花宮仙梵起相如康王  
寒漿成石渠三冷由來滋潤矣秋風病渴起相如康王  
大谷廉布泉天下第一學翁書何似醺壇百尺井汪洋  
不竭如千頃味甘軟美列且清一歌令人發深省淡而  
不厭得中和靜然病補忘馳騁一穿一錢晦海通魚龍  
出沒水涵洪山松嶺毛浮蒼藻不知鹽味何由空即饒  
丹砂百尺茂初非補井病入救澄清明月湛寒泉余幹  
玉翳蒼苔繡道人分我一杯清七梳盧全眼界明沆瀣  
丹黃同一氣油囊酒盡可同傾自愧德慙耿恭拜徒有  
水符代錢買龍門大井以盤只是暑殘資夏快爭得  
碧林堂井馥南陽鄰縣計水荇不惟愈疾且延年煮成  
白石元根復



沙井巾子山麓邑中泉脈皆鹹獨此泉美與洗馬池相近

王令志

謝泰宗淵德觀前沙井記 自黃帝作火食民無茲脣  
病水遂以熟用矣黃帝又作井以便民用隨土所宜因  
以爲利不必應夫星也故有出鹽者有出火者有出丹  
砂者百物備焉有苦者有甜者淡者五味別焉惟土所  
宜惟土所利矣家有正祀者居其及物者要哉考定  
志淵德觀井載焉者井在城者約百有三十所而邑乘  
所載惟此夫其井在百三十所之內也豈有異哉雖  
其廣與東西南北俱同止十尺深耳卽云注之而不竭  
挹之而不窮亦何以見其不窮不竭乎井亦胡能號於  
人曰我其出之有本內以爲泉原浩然和平以爲氣  
淵者哉人亦猶是耳也聖賢之難至而節始見貞臣也累  
至而行始明當其混然聲色不露亦若水渟之盛平平  
焉耳今夫井有一水一無水曰獨洵獨竭也洵有水平  
洵然今豈謂凡井皆竭而沙井獨洵獨竭也洵有水平  
明也獨釋家稱功德之八以甘洵爲主則口之於味莫  
不以此爲同嗜焉誰爲納青水於其中蓋海王之國鹽  
茨是謹其飲茹多斥鹵不可食茲得沙氣之多若有呂  
翁值之九者故杜康藉此爲九醞之種冬月日時陸陸

之緒瓶罍腹者相擊礮也語曰金石流精以成水非謂  
凡水皆然正如此非其功德之味而又注不竭挹不窮  
斯爲美耳倘泛泛然湏洞滴漫退滿則後推前杜曲則  
擣毀擣毀則傷人而難治以至於不孝而不臣總水屬  
不理孫焉耳泉之有本豈庸不考與定邑來脈自江南  
竹山穿峽過巾子山井當山下根之受雷處曰剛似吮  
得山之肥潤以生津吐液者昔管仲之掘泉其施七尺  
廣田五施其水蒼赤壚四施其水白而甘三施斥堠其  
泉鹹黑地其水黑而苦今茲水所自來正當地脈蘊隆  
奔會之處其甘冽非無故而然者且汲者於其下時得  
松柏實之物不特與潮通與山通矣然使一汲再汲泉  
之竭矣卽云自中何異覆杯水劫堂上又使當春潦汗  
盛秋水時至百川灌河之日路井之蟠亦望海若旋其  
面目何有此有本之水使人歎汲深綆短者惟植蠅蟻  
肆虐焚巫焚起之祭金石流澤若焦矣反無以振惠當  
厄而慰人無己之求又何以別於百三十所目於晉井  
而得之也今百三十所之井豈無盈潦灌河之勢以爲  
無當於厄之日耳豈不聞飢欲死渴亦欲死哉歲辛丑  
夏五月至又七月不雨驟風飲河胡以滿腹風之過也  
損焉日之過也損焉一杯之水飴若甘露矣豈但山居  
者腰囊相遺也哉余見趨沙井提壺者如市歸焉何寢  
處輾轉側者晝夜無息也東門居者疑西固水之生方

乎南方居者以水旺元武地乎皆曰與甌與塵矣而沙井猶夫盈潦灌河日耳若百三十所之水滙於一水而莫得其求竭之時又若造化之權山川之利一井可以奪之而人享其飲食之偏德倘天不乾封人不竭渴茲井亦在百三十所之中而無以自明人之忠貞名世者不亦猶是哉余誠願飲百三十所盈潦之水不願飲茲井當厄之惠也然天災薦凶君相詘濟人之術惟此井功德及民千萬人亦千萬世豈但與邑乘同不朽哉

心菴井縣治西北二百餘步薛家衙居城之中因名旗

蘇廟井縣治東北三里水清味甘造酒家多用此城隍

廟前井後井中井俱縣治東八十步真武宮井形

家以南薰門屬丙丁向宮位北方鑿井以制之助海廟

井縣治八井阜成坊東日井阜成坊西月井東衛

牆井西衛牆井土地祠井捕廳衙井主簿廳井

監禁井

總鎮府箭廳井

總鎮府後街井

即今演武場

叅府署前井 叅府署後井 叅府箭廳井有 守備署

前井 學署後井 把司署井 軍門府後井 雙司前

井 倉基衙井 孝門坊井 倉下河頭井 草營房井

十劉營井 買鹽衙井 樊衙衙井 武衙橋井 童

李衙衙井 胡戚衙井 龔家衙井 徐家橋井 富德

巷井 水門巷井 三官堂前井 淡水井 前坊井

後坊井 鎮遠門井 南薰門井 清川門井 武甯門

井 向辰門井 洋山廟衙井 陳衙衙井 朱衙衙井

育嬰堂井 公善局井 邑濱海地鹹居民皆取飲於井

稍遇旱卽易涸慮有佔井爲己業者因詳載之

乾隆志

城外

鎮海縣志

卷七

濠河繞城三面自招寶山發源由東而南復折而西至西

海塘止與夾江河通

采訪冊

招寶仙井在招寶山巔久旱不涸

嘉靖志

一名自在泉

王令志案

招寶山麓井水從石罅中流出

王令志案

東海塘井

采訪冊

東管鄉

夾江河卽前大河從西市抵鄞桃花渡綿亘六十里原港久湮田疇失溉舟楫不通宋淳祐六年制帥顏頤仲役工浚故河盡復廣五丈深一丈二尺民頌其德因名爲顏公

渠張卽之書以刻於石

乾隆志

顏頤仲疏示 照得民以食爲命食以農爲本農以水利爲急本郡田畝全藉水利如東管則賴有東湖之水西管則賴有它山之水獨自桃花渡至定海縣一帶東西南北周圍六十里舊有河港久不浚治日侵月佔皆

爲湮塞水無可瀦惟仰天雨晴未十日卽已旱乾農家  
無計可施坐待其槁昔號膏腴今爲磽瘠食且不給何  
以爲生居此方者委可憐念其次則裏河既已斷茫未  
免冒險涉江民旅往來軍兵打請又有風潮不測之患  
數十年來太守屢嘗有意開浚只事體重大費用浩繁  
莫敢輕舉當茲冒暑千里宅生之寄常軫視民猶己之  
心苟可興利豈敢各費亟欲趁今農隙支撥錢米雇募  
夫工自桃花渡直定海縣西市依舊來河道盡行開浚  
爲一方無窮之利其間近河居民或有侵占舊來河道  
爲田起屋者自當悔悟目前冒占官河之非體承州郡  
爲民興利之意各謀改徙毋復執迷斷不可以一二人  
之私計而妨六十里之水利本府亦當斟酌地段支錢  
給助應是開河之費盡從本府出備更無一毫擾及民  
戶所台先行給勝曉示者

歲久復淤明嘉靖丙申縣令王文貢疏之萬厯閒令丁鴻

陽又疏之

王令志案

國朝康熙二十六年令周家齊濬之田上出穀甲上出夫

民稱兩便紀以詩歌曰渠成集經流東至白龍洋與中大河台西至三官堂止其支流西一支南出張家堰北經橫溝河鶴庫下至曹家庫堰與官倉港合約長十五六里中一支南出李家堰北至楊家庫頭經官倉港入大寺堰與中大河合長二十里半路菴一支北至漢塘大有橋南至夏家滙經衙頭堰出筭箕浦河無源而與中大河高低又差三五尺故常湮隔計水利者惟於官倉港力加疏濬則慈水源通田疇攸賴矣

乾隆志

萬弓塘河自後海石塘盡處抵澥浦卽宋嘉定間邑令施廷臣所築土塘以續者元時崩廢明洪武後屢爲大潮衝沒塘下之河亦至淤塞時海寇登犯苦無攔阻

國朝康熙十五年總鎮卒大寅循故蹟集民濬河土以益塘塘高以攔海潮河深足以灌田畝且延袤四十里皆濱海地今界以深溝高塘易於守望寇不能越水飛渡自此比室皆得安枕海田變爲膏腴民甚德之立祠於萬壽菴

歲脩其祀

唐令志彙

謝歸昌記定海萬弓塘者昔人築以障海也而塘之內有河亦猶城之外有隄蓋取其土以築塘而遂成天塹河深而水積民得引以灌禾食其利者何啻千百家迨明季而後失於挑濬同向時灌漑之利今竟罔有然不得其利猶未見其害也迨以海氛未靖將慮有自塘越河而害我民居者時見告總戎牟公巡視至此嘗慨然興歎曰今卽不能高築其塘而營河之故道可鑿也戊午季夏會有士民以濬河請公曰此我意也爰卽下令鳩工計丈挑掘公單騎巡視親相慰勞謂今一時所苦庶可以永逸務廣其土深其河而堅實其旁俾爲不竭之川焉至若執轡鼓驅徒衆有索酒食而擾閭閻者以告百姓聞言趨事不輟不俟一月而河工告成意嗣



是而後寇不得以飛越民得以藉茲灌溉塘則金城也  
河則湯池也河以內之新田中鄉則沃壤也一時有利  
而無害大將軍之偉烈爲何如哉往哲有言過河洛而  
思禹功其公之謂與余離梓里官長安常恨不能助公  
爲理遇邑士從公車來爲道公盛事且曰宜立石以垂  
不朽卽屬余爲記余曰四明全浙之咽喉定海四明之  
鎮鑰自公駐節輿圖於今三載凡所以仰報  
國家俯衛生民興利而除害者何可殫述卽濬河一事  
安定邑以安四明安四明以安全浙之壯猷也萬  
弓塘行將歌萬年德余何能以不文辭因爲記

長河三都東北接范家大河西分南北二支南支至橫河  
堰北支至靈漕頭雍正三年邑生徐名新照田派浚乾隆  
十年後河淤不通潮汐十二年八月邑生徐名光率沾利  
之家浚闊一丈深三尺潮源湧入車灌利焉

瞿家港二都

三港口二都東通城池西南通夾江河西北通中大河

吳家港二都前接中大河後抵上塘溉田二千畝有奇

童家港二都長三里溉田千畝有奇

傅家港二都溉田千畝

官倉港三都

黃泥洞港三都

謝家港三都

李家堰龍潭三都貼近江岸官民禱雨皆至此

華家滙二都

章拘滙俗名莊下滙二都

馬嘴滙三都約在大澱江之中截與李家堰對南北一大折爲內江險要處

夏家滙三都

包家灣三都

張鑑硤浦二都

衙頭浦三都

筭箕浦俗名瓦窰浦三都在夏家滙東

清水浦二都古傳爲湖今湮廢

以上乾隆志

西管鄉

徐港岸河四都是河之通潮源者始於貴勝堰自堰而東達於東管自堰而南直達鄧之磚橋由南河而達於西管一莊者渥有二一派東至綳子港又東至於陳默子堰南折交河隄過彭王廟前入一莊河道紆而遠往往潮源不

及至一派入徐港岸過前後塘東流爲橫大河入一莊河道近而捷此爲潮源要害地也由是而至孔浦至白沙東至於鷺林東北至於三官堂與東管三都界其支分也衆則其所濟也溥疏濬之施較他處爲尤亟云

穿心河四都河長三里有奇其通支江十有四通河嘴二港曰烏家港鹹井港東河港西河港門前港水倉港沿河港菱港陳家港小墳港戴家港止水港張家港上祀港其河嘴曰祠堂前河嘴盧家兩河嘴分貫兩岸以溉田禾從未挑濬時患淺涸乾隆十一年邑令王夢弼因士民所陳委員督濬水足溉田并修橋高闊凡運糧船隻暨民間採捕等舟皆得通行

以上乾隆志

中大河六都自慈谿縣茅津聞發源至駱駝橋分港南抵  
鄞縣北通靈緒一都長五十里嘉靖乙未巡按御史張景

令重濬鄞人吳惠爲之記

嘉靖志

國朝康熙二十五年邑令周家齊濬前大河中大河

唐令志彙

水性清緩水面約闊四丈遇水盈滿從頭聞二閘出水入

海乾隆

志

薛士學河渠記事

鎮海舊名定海境內田疇所資灌

溉者水泉不一區而近郊則以西鄉兩渠爲要前渠沿

江塘自城外五十里而至鄞東白沙村濬之自張鑑硤

始及於慈谿臨中渠自出水門迴龍菴側至駱駝橋橋以

西接慈谿版籍故慈渠通鎮邑大淡江之潮水慈水自

餘姚東百里而遙未及鎮渠之大寺堰而潮已止堰以

左惟藉春霖歲稍旱則潮亦僅過駱駝橋三里許不能

抵堰又渠深祇丈餘無從多積水故皆謂亟宜挑濬然  
頻年而議之弗就也縣令周侯以康熙丙寅秋初濬任  
嘗策馬循渠而往以受事郡中視渠身之淺狹易濬無

以利我農人則慨然思與父老卜鳩工也夫爲民興利  
者人情所深願修其舊蹟之湮廢以爲經始者吏治所  
宜先然民雖甚願之而或憚其勞也則爲之嗟怨焉吏  
雖欲先之而或捷於衆也則爲之卻顧焉由是事多中  
輟而計與時移至於悅者且病其難而勸者亦生其怠  
渠之宜清吏民亦共知之而行之不果由其慮不規於  
久遠而且姑緩以需時故湮廢因之日甚侯於丁卯預  
試闌三旬還縣則先期示民以具荷勺長緹之屬及期  
而起事會時無涇潦渠中泥淖纔沒脛侯親立亭皋以  
董勸之民之奉約而趨者踵集四十日而兩渠三十里  
之廣深異於疇昔至春末而蓄泄有餘禾苗滋茂矣夫  
海潮繞鎮邑之東境入於城南漢江江波水鹹可汲以  
煮鹽而不可灌陂畝故舊有石塘以界之塘之上官民  
車馬所經行也塘以內爲渠爲民田蘆舍塘以外爲江  
江水西行爲鄆之桃花渡又北折至慈谿與慈南之水  
渠交合而鹹水易侵渠唐開元中築小西壩以截潮流  
又西行而江至丈亭皆慈境也慈非瀕海爲邑乃其田  
獨取吾鎮之江湖者蓋自餘姚南北諸山之水畢滙於  
慈而山泉視淡湖其多較倍故水味不鹹然潮性悍能  
挾泉流以漲落故慈渠之水適駱橋以入鎮者一聽其  
候於潮鎮邑西郊地形高於慈壤故不能趨慈水之來  
以東注必清渠使渠底低窪則雨霖可蓄而勢且迅順

以稍引潮流此渠工之不容不急也予嘗稽邑事載於舊志者不具述幼時見慈水秋米至海倉爲定衛官軍月餉相傳慈先有名御史爲其里甲濬吾中渠便運舟也前令丹陽丁侯濬江塘下之渠俾入郡橋帆不由大決避風濤也近時牟總帥開海塘之渠自沙頭北至渚浦慎封守也此其意皆有所爲而農田亦兼利焉至今人極道之周侯則力爲吾民籌衣食意無可移而時更無庸以少待此其可與往昔名賢相質尤望將來之相繼以久遠其功也

謝歸昌記 定海面江而城鄉區南北南則有崇山達魯川流百絡濬於溝渠故土物潤焉惟北鄉平衍水道淺濶無深池大澤蓄積沖融僅以前後兩河四十里而西接於慈壤又定之地勢高惟潮汐往來資其餘溉若楚越方言謂水之反爲者爲渴故資之者少而洩之者多亘設大寺費勝兩縣嚴其蓄洩春農之際十日不雨則車具畢致以此歲常苦旱旱則輟耕望雲繼以祠禱一不應則一求龍神鳴鉦撾鼓聲震城野慘不忍聞更不應則一望焦禾相視泣涕而已間有留心農事者亟議疏濬然而聚訟盈庭或謂照甲出夫則有田無田苦樂不均之說得起而撓之或謂按田出役則沾利不沾利公私失平之言又起而閒之羣口交沸旋議旋止

河道之不講也久矣父老有相傳明萬厯間前邑令某  
公嘗底厥績然求其故事案牘莫考荆開二南周公來  
蒞茲土歎曰古之人鑿渠以利民今之人湮渠以病歲  
何古今人相去之不逮也且民之役非以役民而已也  
吾授其直而司平於我誰其怠之今吾使有田者給穀  
無田者役身苦樂不既均乎吾使沽利者無坐享之安  
不沾利者有代耕之食公私不兩便乎乃度以工之丈  
尺食之多寡使食與工相副而工與食相資經理曲當  
通陳督撫咸可其議丁卯十月刑牲就功舉錫成雲決  
土如兩迺爾撤從單中復河省視創有餘日而渠且次  
第告成矣公指顧色笑樂而賦詩士子佩德皆成和章  
名曰渠成集志厥美也古之爲國者首崇水利史起之  
決郭溉鄴白公之引渭灌秦今史白二渠歌誦不忘惟  
公志慕古人廉毅忠信有安利於民者行之堅勇故功  
成如此其速若夫播之聲歌則政治與文章相表裏余  
故因詩而序其事使後之墮事者可按牒而稽焉則此  
物此志也不然拱璧大鼎  
美在人目尚可以言重乎

李上瀛濟河議 予聞之書曰德惟善政政在養民夫  
養民之政莫急於五穀五穀之資莫急於水利而鎮邑  
之所急尤在於東西管兩鄉鄉之南爲前大河鄉之北  
爲後大河中港一條串貫前後兩河者所謂官倉港河



是也計前大河自城西平水閘起至慈界鄞界鄞定橋約計五十餘里後大河自平水閘起至慈界貴勝墩約計三十餘里官倉河下計十餘里共得河百里以接丈亭湖流者也患在河身淤淺布種時車具畢集洞可立待縱遇西風大潮湧入兩鄉或至大寺堰而止或至莊下漚而止終不能到白龍洋三港口而達於夾江河則兩鄉之所以有流無源也前此非不慮為淘河止在河中濬掘丈餘其所掘之泥又堆灘上雨淋水冲仍填河底則淘與不淘無異且淘河之令每下議派夫役有田者議之甲無田者議之田道謀之口有不議派夫役者期哉今夫法者前人之所行後人之所師也昔年邑父母周公令有田者給穀無田者役身業有成案茲稽兩鄉之民可得壯丁三萬餘台兩鄉之丁數派兩鄉之河工其法令保長各於鄉內之河首尾立一椿牌以為限牌書某圖保名姓下細開甲數併注各甲長姓名共甲夫名數台一保所統甲數定其段落丈尺派濬一保之河其甲亦立椿牌開列甲數甲長甲夫姓名暨河丈尺自一至十次第井然辰集申散淘濬必依河面兩邊止畱二尺其餘俱令淘深準以七尺為度淘泥必要運在河塘闊并便行人更一舉而兩得前後大河之東半截邑令或委捕廳督之西半截或委管界司督之官倉河或委長山司督之委員務飭秉公督察如甲夫不至則任在

甲長報官懲治甲長不至則責在保長報官懲治有不  
至不報而督員挨牌查出者保長連名坐罪而邑令又  
時加親驗其有豪矜地棍把持阻撓者嚴加重處則恩  
威並至而民氣倍增矣至於於斧資不假胥吏使富者自  
爲給資者自爲收正所謂沾利者無坐享之安不  
沾利者有代耕之食公私兩便奚患不底厥績哉

燈檠港四都

箭港四都

陳家港四都

陸家港四都

徐家港港口有止水墩五都

穿心港五都在壓賽廟東直通孔浦

東港五都東流至莊市長十里

劉家前港五都長里許

劉家後港五都西流至鍾家堰長三里上三港俱中大河  
支流

塌水港五都

泥龍港六都運糧由此北界慈邑

澄波港六都

澄波港六都以上乾隆志

孔浦四都嘉靖志

靈緒鄉

西河一都自慈谿香山發源東流至二都由澥浦入海西  
流合斗門山十五里合大河嘉靖志地如建瓴水性緩水面

約闊四丈雍正九年七月縣令趙應召浚治靈緒各河有

碑立覺度寺前乾隆志

趙應召濬河碑示畧 爲循例濬河懇飭永遵事蒙本  
府曹批據縣詳東西管前靈緒地方各河應著業戶按  
田開濬不許按甲派夫等緣由奉批加詳勒石永遵繳  
案據前靈緒二都七里地勢高旱應濬橫直六河闊計  
六丈深計六尺支港隨河身廣狹亦期一例深通合行  
勒石仰前靈緒巡保各業戶佃人等遵照嗣後挑濬河  
道業戶按田開濬倘有在城住居遙遠者卽著佃人挑  
濬於秋收時每畝除穀五觔以作辛力不許按甲派夫  
示爲成例須至碑者 應言六河直東大河自周家斗  
堰由覺度寺至海溝沙河又曲至浦橋斗門止直  
中大河自清水溝余家橋外河口起至戴家洋山嘴止  
直西大河自黃沙關起至李橋橋至縣家山下沙堰止  
大河自黃沙關起至李橋橋至縣家山下沙堰止橫中大  
河自釋木廟前孔家橋起至東由鶯宿橋至戴家河  
嘴又曲至蔣家後港日止西由梓木廟後河至嚴家  
嘴止橫北大河自瓦窰港周家橋至後戴河嘴止

大閘河三都白鳳浦湖發源西流至四都接慈谿縣杜湖

長四十五里嘉靖志地勢高旱水性清緩水面約闊四丈遇

水盈滿從淡水泓閘出水入海河中有堰三宣家奉公南門亭是也宣家以東地勢高與海近水易於洩常患旱宣家以西地勢下海漸遠而浦之曲折又約有二十里一經久雨壅積不行田常湮沒補救之方莫如亟濬松浦大半屬慈鎮民難之然慈之與鎮鄰者寄莊多藉於鎮浚河非但便鎮亦以自利也

乾隆志

海塘河三都白金墩硤西起流至鎮龍閘入海

乾隆志

白沙湖

寶慶志圖

二都周環二百五十步

嘉靖志

灌田一千畝

江浙

通志此湖地勢非窪泉源亦淺近更淤墊恆見枯涸一時議濬爲難宜集沾利之田遞年分段疏之久而仍收濬蓄之

登

乾隆志

鳳浦湖縣北七十里寶慶志周環十八里嘉靖志三都四畝田

禾仰以給漑潤自豪民於湖灘漸次請佃湖身日狹儲水

無多每遇旱暵湖已先涸沾漑無資四畝失望已前不可

復奪嗣後應立法以杜佔墾

乾隆志

沈窖湖縣北一百里漑民田數百頃寶慶志周環十八里嘉靖志

嘉靖三十五年知縣宋繼祖相湖地勢南北高下中建

土塘長八百六十餘丈置閘一有碑記詳湖塘水利圖說四都

一畝二畝藉以漑田東至奉公堰西至宣家堰南至湖隄

北至官塘下起科田止南北皆隄舊建兩閘志乘失傳年

代一東閘一西閘惟救苗閘方啟遇東閘水溢則啟淡水

泓閘以出之自宋令建湖中閘並舊閘而爲三以時啟閉

利甚溥焉但塘歲久失修漸多坍塌而閘之啟閉亦曠所  
司湖流因是乾涸豪民佔墾致雍正年間令張珽任內有  
爭塞湖涸之憂夫湖水得以蓄洩者塘閘也修廢啟閉相

繼弗壞庶溥其利於無窮歟

乾隆志

靈緒湖四都五都交界周環五十里

嘉靖志注五都周環二十里

四都

三畝暨五都一二三畝之田俱藉湖蔭溉東至沈窖湖南  
至東埠鎮洞橋頭西至鷺鷥堰北至宣家堰三面皆山惟  
北有隄任家溪東西兩畧之水匯瀦於湖閘有三一名湖  
東湫屬四都三畝啟閉一名湖西湫屬五都二畝啟閉一  
名羊坡溝屬五都一畝啟閉水注松浦閘例定清明後一  
日三閘統閉當夏秋旱涸均候四都三畝傳單啟閘蓋以

四都勢居上流其河先他處而涸也其五都三晉處縣邊境與慈交界放湖時必填塞鷺鷥洞橋宣家三堰以裨本鄉而湖之西南多屬民居竊水者後先踵效以致沾溉不均是亦水利之蠹也其羊坡溝自閘外起至東埠鎮洞橋頭約長二里許寬僅丈餘深止數尺兩岸有田一千五百有奇遇亢旱卽乾涸端賴疏濬深廣焉

叫天港一都

梅林溪三都

雲溪四都水入大閘門

匯溪四都

任溪五都水入靈緒湖



砂溪五都水入大閘河

長溪五都源出慈邑

湖門湫五都

杜門湫五都

滙源龍潭二都在息雲山麓

以上乾隆志

區溪龍潭四都黃楊嶺遇旱鄉民祈禱屢應元大德元年  
潭側建祠以祀

延祐志

香石潭五都在香石山頂

石陡潭五都在東界

善應潭五都在西界俗與石陡潭皆呼爲龍潭水澄崖峭  
卽盛暑亦寒冽

蘭池四都

雙硯池四都

荷花池四都在立鴨山下方圓八丈許

沙灣四都沙嶺北

湖灣四都

蘭灣四都

桃灣四都

黃桐灣四都有古石爐一座舊傳漢馮異曾憩於此

以上乾隆志

澥浦二都漁舟聚集之地外通大洋有巡檢司及稅務在焉

延祐志

卽古渤澥西有崑崙山東有渤澥島外大海舊有

鎮簡要  
志

梅林浦三都

徐家浦三都

鳳浦三都

金墩浦三都

透瓶泉四都在洞山寺左泉味甘美取泉入瓶越宿透露

如珠明唐寅慕是泉來此題日以好心來到菩薩所字迹

尙存

以上乾隆志

陳景沛案曰諸志不載乾隆志未知所本惟奉化

東有是泉名云以甕器貯之越宿水透瓶外

海眼泉

寶慶志伏龍寺注

陳景沛案曰乾隆志載玉泉注本延祐志攷寶慶  
延祐二志皆在象山東北有玉泉廣福院而定海  
伏龍廣福院在縣西八十里有海眼泉是因寺名  
同而誤入也當去玉泉而入海眼泉

斗眼井一都

司井二都澥浦城內水源不竭

龍頭場井三都

龍眼井三都雁門嶺上慈鎮交界

砂井三都邱洋驛路旁明時定鎮戚繼光兵馬至此皆渴  
於是地鑿井至今久旱不乾

黃婆井四都達蓬山腳

大天井四都明信國公湯和鑿井有二源泉湧如潮投之以石卽時沸起灌田數百畝

國朝雍正元年大旱四方數萬口皆汲是井

小天井與大天井同出一源

湖灣井四都在黃東發公湖山書院側

以上乾隆志

崇邱鄉

謝墅河二都自鄞縣東錢湖發源東北流至石橋港分流

過東斗村抵東岡磧長二十餘里

嘉靖志

地如建瓴水性緩

水面約闊三四丈

乾隆志

新大河四都自鄞縣東錢湖發源北流至練盆橋分流至

橫山橋黃滿堰抵東岡磧長十五里水從東岡磧入江

嘉靖志

志

東錢湖一名萬金湖唐天寶閒鄞令陸南金開廣八十里受七十二溪之流四岸凡七堰水入則蓄雨不時則啟閘而放鄞定海七鄉之田資其灌溉簡要志

國朝康熙初年派修礮閘邑令王元士以鎮之閘板築在下鑿石以志唐令志棄三十二年鄞民惑於風水之說於紀家

橋石蹠頭處乃湖水入鎮咽喉築石塘以攔截之紳士傳

嘉說等陳於縣縣詳府考之鄞志並無此塘立命毀之恐

後仍築立碑永禁一在府門一在丁家山之淨巖寺雍正府志

謝兆昌記古之厚民生者重農莫如治水國家所以考牧守之績必先於此若我甯郡則以郡東東錢湖爲巨浸而鄞與鎮海鄞錯壤湖之四面周環八十餘里其經流所遍鄞有六鄉鎮有崇邱八里引湖水灌田禾

四萬畝而湖水南來自五鄉硤北而迤東直達於鎮之  
小澹江以趨於海故崇邱不引錢湖則田疇無以資其  
利錢湖不注澹江則水勢無以分其流是則鄞與鎮兩  
縣之泉源水脈相爲表裏利害共之所當並亟疏通無  
容壅塞者也自昔至今鄞鎮兩縣人民均輸湖稅無有  
爭差明嘉靖時邑侯宋繼祖爲計久長思深才敏相度  
地形之高下與水勢之縱橫築石東岡山麓民賴其力  
農田不致災傷蓋因前此小澹港海潮每有乘秋逆入  
則東岡以內土盡泥塗鹹水所侵禾麻不值大司馬鄞  
人張時微爲碑記有云自宋侯經始以後東西二十餘  
丈東爲堰西爲硤皆曰東岡堰以蓄永硤以洩水自硤  
以上爲河其下爲江鹹水不得內湧河渠無從外奔溉  
田無慮數萬昔時密閘之地盡作膏腴畝入數鍾不惟  
崇邱之田無憂旱暵卽鄞邑六鄉亦咸被澤矣此皆賢  
令之盡心區畫賢公卿咸知之故其文載之縣志彰彰  
不可磨沒迄今則有傳李二姓族衆繁多敢於鄞鎮交  
界處拆毀巨古橋梁獨流造壩使湖流百世之利阻遏  
不通彼蓋聽信堪輿風水之說恃力抗衡水淺則僅及  
鄞田而崇邱不沾其潤滴水大則波高於堰而崇邱獨  
被其激衝此

國家貢賦所係鄞鎮人民急公樂業舊有同心豈能逞  
豪強之私謀不遵成制快於自便而使崇邱廣輸三十

里之畝疆偏苦受害乎於是閩邑士民控於縣令黃侯  
侯以請於本郡張公公仁而能斷廉而有威神明之稱  
遠邇驚服爰是屬黃侯親行按視嚴杜侵凌正其故道  
錢湖水勢自鄞人鎮之區條理分明通流如昔六邑之  
人皆頌公秉心公溥洞燭隱情纖悉不能欺匿凡公之  
所以臨蒞吾甯者其光明俊偉事皆如此予於是記其  
始末以鐫諸石而後系之詞公名星耀號紫昭直隸武  
強人黃侯名宮柱號擎菴福建南平人其詞曰藹藹張  
公中懷愷悌雅量能容莫窺涯際肅肅張公潔已自持  
金石為質堅而不移倬彼張公神澄若鏡悉我民依布  
茲惠政張公彬彬古人風度人譽所宗英賢攸聚惟我  
海邑是謂巖疆公輯文武聲聞孔長經營農政相其流  
泉父老謳吟被以管絃管絃伊何德音是茂為時名臣  
又記康熙三十二年癸酉鎮之士民以鄞邑之阻塞  
河道妨鎮邑引湖之利也合而訟其事於鄞邑令黃侯  
躬往視備以聞郡守張公下其事於鄞令黃侯撤毀石  
址河道復通鎮民頌公之神明爰樹碑於郡署儀門余  
既為文記之復以侯之視吾民如痾瘵乃身也謀所以  
興廢之久遠者而以記來請余曰唯唯大抵詳一邑利害  
按志鄞邑東有錢湖唐天寶三年令陸南金益開拓之



鎮海縣志

卷七

山川

五

易田爲湖以其田賦賦之七鄉之田每畝計米三合七  
勺三抄自是灌漑滋廣其時鎮未有包江之南地盡屬  
鄧無此疆爾界之殊也後唐乾甯四年錢氏始置縣宋  
熙甯十年復割鄧之三鄉益縣南境而鄧與鎮始有分  
壤矣且小浹江之潮乘漲逆入處處宜防土石之功不  
貲兩縣之民交誼則羣聚而閭故明嘉靖三十四年令  
宋繼祖乃移五鄉砦於東岡山麓潮水避去二十餘里  
塘堰盡瘳湖流益通羣譁始帖然則調劑之力多也近  
湖修築砦板以資蓄洩而砦板之規未定當天旱湖水  
淺不能盈渠至鎮海而水力愈弱康熙九年令王侯元  
士爲請於當事販分上中下自下而上以鎮爲首蓋啟  
下販湖水乃盡瀉支渠畢達田成膏腴則放水之法備  
也夫天下事安坐而享其逸遂若川澤自然之利振古  
如茲今卽一鄉而論幾經賢守令之綜理經畫乃得底  
於成功斯以知農事之艱而鎮邑世世食仁人君子之  
澤爲可幸也不然者地勢有變遷人事有巧拙而豪民  
復譁張其說以惑聽上之人一不察而決裂隨之幾何  
不使萬世之利墜於一旦哉夫墾田必先治水昔人講  
求之良法在在皆是惟在後之人踵其成勞而弗憚於  
率作則旱潦有備而凶荒可無憂也其以佐大司農之  
經費願不鉅耶余故因是舉而備述其事誌侯之德且  
以告後人侯名宮柱福建南平人宋繼祖四川漢州人

王元士湖廣麻城人  
碑樹淨巖寺

乾隆六年鄞民以前梅二碶門闊遇水勢湧板長力軟難於抵禦恐致沖決田廬設立中柱保護閘座鎮民以增立石柱必致湖流遏抑不能遠達新謝兩河互相控訴鎮令楊玉生與鄞令傅栢會勘詳憲拆柱鎮令復捐銀四十兩移鄞置產幫貼歲修碶板之費道憲以水利攸關仍仰兩縣確勘十三年鎮令王夢弼會同鄞令宋紹彝勘議前堰碶門闊一丈一尺九寸今將碶垛放闊一尺梅湖堰碶門闊一丈三尺四寸今將碶垛放闊一尺以補中柱之數楊令捐貯庫銀卽爲二碶修築公用嗣後如遇天旱水乾鎮民報官委驗徹底開放俾水遠達溉田鄞民不得指阻鎮

民亦不得私自擅放水利均沾無虞沖決詳憲定案

象鼻港二都

王家港四都

以上乾隆志

章家溪縣南三十里

寶慶志

三都

延祐志

長山溪三都

乾隆志

蛟門龍潭一都在海山洞口詳祠祀

乾隆志

陳山龍潭一都縣東南陳山巔

雍正府志

張懋建詩

陳山勢抱邑南東千仞岡畱一壑風知是氣髣掀不住暗泉紅雨白雲中

周急潭一都在泥灣山南大嶺脇上潭甚小泉甚甘久旱

不涸故名

乾隆志

清林龍潭久已湮塞宋嘉泰中旱縣令商逸卿訪求故迹

禱雨卽應自此逢亢旱縣令率士民詣潭請龍祈雨屢有

奇驗

延祐志

在淨居寺對山

陳志

陳景沛案曰乾隆志本王令志彙以清林龍潭列於靈巖二都不知清林卽淨居寺之鰻井龍潭也靈巖無此潭寶慶志不列龍潭類故詳注於寺下觀注自明當從延祐志列於崇邱改鰻井爲清林龍潭

青漂龍潭三都在白虎坑山中閒深不滿尺泉水常盈天將雨先有雲霧出沒其中鄉民旱禱屢應

華四龍潭三都在靈峯寺後明有崇邱鄉華姓兄弟四人因天旱求雨捨身丹池而死大雨旋至嗣後里人遇旱祈

禱屢應

水汎潭三都

雙峯龍潭四都

昆池三都在蛟門西約廣二十餘畝久雨不溢久旱不乾  
近池田百餘畝賴灌溉焉

練盆池四都在裴晉公祠西偏室內世傳葛仙翁煉丹處  
其源直接雙峯聖井龍潭久旱不涸以上乾隆志

師古池在橫山下中有深潭大旱不涸采訪冊

張錫路詩作事必師古於池復云何我知命名意罕  
譬不在多百川務學海細流不擇河井汲須得稷原泉  
亦盈科知此淵淵中萬象涵森  
羅人無於水監此義慎勿訛

灣草滙一都

扶家滙二都

泥灣一都

蔣灣三都

青灣四都東岡山裏

張師浦三都

板橋浦三都

以上乾隆志

鄭家泊縣南十里

唐令志彙

東山菴井一都

乾隆志

霞井一都井有二一在覺海寺前曰裏霞井一在清泉場

前曰外霞井二井相去數十步時有霞氣縈結其上

采訪冊

張錫路詩

古井無波湖裏外鑿雙竇下有泉脈通上有霞彩覆霞氣芬如蘭泉味濃於酎渴飲飢卽餐遑計

昏和畫一搨滌塵心再搨登上  
壽詩思雜仙心不覺吟來瘦

慈濟菴井二都

蘇家井一都

鰻井三都

聖井一在三都一在四都雙峯山之腰有龍潭深不盈尺  
久旱不涸名曰聖井世傳嘉靖時征倭龍化爲老人汲水  
助陣旱時民祈禱或化爲鰻背上九節無尾若井上興雲  
霧卽雨

以上乾  
隆志

靈巖鄉

楊洛河一都阿育王山下發源東流合太白山水至石湫  
地埭腰西北向章家橋接靈巖水抵長山碕入海

王令北  
志彙

接孔墅嶺山諸水從烏金硤入海一從畢家硤入海

唐令志橐

地高水性清緩水面約寬四丈

乾隆志

橫河發源楊洛河頭

大蒲河二都舊爲浦大硤畢家硤石方硤之水皆放此曲行二十五里至三山浦入金塘洋今建永豐硤截斷爲河石湫河上接洞巖此巖高數十丈頂上出泉湧流而下水闊十數丈天雨七分下靈巖三分下泰邱晴久三分下靈巖七分下泰邱

嘉溪一都

仙人溪一都靈峯山下

萬善溪一都永福菴前



宋家山溪一都萃舉

磐石溪一都石馬舉

瓊瑤溪一都南山

徐家溪二都

楊家溪二都

以上乾隆志

新婦潭有娘娘祠

寶慶志

連年風雨損壞無存

延祐志

陳景蒞案曰延祐志云崇邱四都乾隆志云靈巖一都

蜃潭一都靈峯寺旁里人當旱時每因蜃氣出沒以覘晴雨

董家河潭二都演法堂前

上菱池一都

下菱池一都

待月池一都瓶壺山一在靈緒達達山

白蒲灣一都布陣山後

石柱灣一都鳳凰山南

林家灣一都白石嶼山下

止牛灣一都大瓶壺山

唐家灣一都

董家灣一都以上乾隆志

槎浦寶慶志二都乾隆志

朱家浦寶慶志二都乾隆志

大瀆浦二都

算山浦二都

方井一都岡密嶺下

倪家井一都狀元山下

管家井一都石蛤蜊嶺下

柏樹井一都廟山北

沙井二都演法堂畧口

槎浦畧九井二都周圍二畝餘

以上乾隆志

泰邱都

屯埭河一都自盤界溪發源東流接靈巖城灣塔嶼諸水

下楊木堰趨小山硤入海長三十里

王令志彙

啟霞溪二都

盤縣溪二都

邵似雍詩 七尺茅廬傍水灣笑談常在翠微間穿花野鳥無名字入室孤雲自往還隻屐尋幽過白日五更殘夢下青山持竿偶出來垂釣月上牆頭不閉關

慈縣溪二都

雁潭溪三都

以上乾隆志

石湫水源出太白王荆公經遊記所謂下靈巖浮石湫之

壑是也

寶慶志

一都嘉靖志

水中南北二石方圓相交

陳志

鄭賡句 一水玻璃似茗雪羣山俎豆勝方壺

雁潭三都禱雨屢應

王令志

石蓮灣一都

小城灣二都

大城灣二都

三山浦三都

霞浦四都

路局井二都

古名井四都在陳華鋪基北石結成

以上乾隆志

海晏鄉

蘆江河一都自瑞巖發源向東北流而洩於穿山硤長二

十五里

王令志纂

鄭之南蘆江水利議

育王嶺左之河有三其極東者

曰蘆江河縱橫約各二十里南受瑞巖十二峯上傳九

峯起永豐石人五峯之溪水而東北洩於穿山硤西北

由傳家硤洩於雙礁硤諸山聳起壁立水易傾瀉淋雨

驟至河不能受則盈溢泛濫一望無際而苦於淤穿山  
硤僅三門傳家硤僅一門水勢汪洋不能驟洩則沖潰  
隄塘循築未竟水可立涸而又病於旱夫淤則宜瀉而  
蘆江之河防淤偏宜於蓄謀所以蓄則可以受諸山之  
水殺其勢而不致奔潰也旱則宜蓄而蘆江之河防旱  
偏宜於瀉謀所以瀉則可以止沖決之患固其隄而不  
至乾涸也欲謀所蓄非濬河不可若紫石灘若陳勝洋  
若風打塘與鍾靈橋石欄橋硤頭河施隘周大河諸處  
皆盤旋廣闊不下數十餘頃然蘆葦淺灘水僅沒頸若  
濬深五六尺則儼然巨浸也何患水之不受而至於穿  
况洩又隨其後乎欲謀所瀉非多設硤閘不可若於穿  
山硤旁增築旱硤五六門照舊來所定水則以水之面  
爲硤之底大潮則閉以阻鹹小潮則開以瀉淡時時瀉  
洩何患隄之沖決而至於旱况蓄早備於前乎蓄瀉得  
宜則旱淤有備而後可無虞蓋邇年頻頻海嘯踰隄塌  
塘潮水所至不終食而禾稼盡斃顆粒無登雖天災之  
流行亦人謀之未臧也夫塘最易爲力穿山塘僅數百丈傳  
禦海潮者也蘆江之塘最易爲力穿山塘僅數百丈傳  
家塘則十餘丈中有泥堰淤塘亦僅十餘丈其餘長山  
高隴橫亘十有餘里若增高數尺培厚丈餘潮來水湧  
不踰隄面不穴塘身而又不時增修可永無潮水之患  
至於塘北之田數十頃係雍正年間新墾雖逼近金塘

大江無山隴阻禦然望阜亦星羅碁布增培修築亦可  
漸觀厥成諺云湖廣熟天下足穿山熟鎮海足不濟河  
不增渠不培塘而求  
歲稔恐十不得五也

瑞巖溪一都

嘉靖志

大溪一都瑞巖山徐家畧印家畧之水滙經小溪而歸大  
溪過邱山橋由支河而入大河今支河壅塞傍溢而北漂  
沒農田則疏濬不可已也

龍泉溪一都福泉山下

乾溪一都雙石人山下

崑亭大嶺溪一都溪水發源瑞巖山過聖山橋東抵蜈蚣  
山之右福泉水與陳家蘇州二畧之水亦奔注焉合流而  
南經小嶺山下出施人橋東入於海

大畧小畧溪一都二水發源於滴水巖合白巖眞武清谷諸水南至於攔瑞橋盤旋於獨峙山右而東注於江

洋沙溪二都

中嶺溪二都

以上乾隆志

釣巖龍潭三都地名福泉山縣境遇旱官吏詣潭祈龍雨

澤遂至

延祐志

蘆浦二都

休暇井一都舊名邱家井又名曩井在田中望之如池雖當大旱車灌不竭旁有田數百畝皆賴是井今俗呼休暇竹葉井去休暇井四十步

中井在竹葉休暇之中其源不竭

以上乾隆志



鎮隅

小蘆江河六都其源發於五峯導中嶺匯楊沙吉祥二溪之水向東北趨小蘆江溪入海

吉祥畧溪六都

箬雷溪六都流趨門浦至官莊及金家莊迤邐而出鳳棲陽繞遮山經遮山橋曲折而至白楓碛約溉田三千餘畝塔山溪六都其流自西南來折落竺家坑北出蔣家畧口過四橋港至下林碛約溉田七百餘畝

雙畧溪六都

小疊溪六都其流自西南蔡山折落鍾靈山下至羽林壩經上保廟過小疊山又由下保廟側直出小疊碛頭約溉

田一千餘畝

岷峙溪七都發源塔山由東西兩鼻溪折至百丈塘經岷峙廟側止岷峙硯頭約溉田五百餘畝

嶼灣七都

鹽亭灣七都

以上乾隆志

穿山浦六都盤旋數曲登山俯覽若兩葫蘆

王令志稟

東大井 西大井 南大井 北大井 靈泉井 清泉

井 安瀾井 王家井 沈家井 全家井俱六都穿山

所

乾隆志

富都湖縣南五十五里又曰萬金湖周圍三十里溉民田

二百餘頃

寶慶志

鎮海縣志

卷七 山川下

彭城湖縣南四十五里溉民田一百餘頃夏候曾先志云  
牆下湖周環一十里卽此湖也

寶慶志

陳景沛案曰富都彭城兩湖見寶慶至正二志嘉  
靖志以富都湖列於昌國城東北又名白泉湖考  
寶慶至正二志昌國復有富都湖皆在州東北八  
十里簡要志以白泉湖亦屬之定海彭城湖嘉靖  
乾隆二志不載姑存於此

案乾隆志載玉泉引延祐志注縣東北三十里廣  
福院前此象山廣福院舊志因鎮亦有廣福院誤  
入今從刪